


Ni Pangulong Thomas S. Monson



# Mga Propeta nga Maggiya sa Aton

**M**ga pila katuig ang nagligad, nagapungko ako sa isa ka kuwarto sang Salt Lake Temple sa diin ang Unang Panguluhan kag ang Korum sang Napulo'g Duha ka mga Apostoles nagatipon makaisa sa isa ka semana. Nagtangla ako sa dingding nga nagaatubang sa Unang Panguluhan, kag didto ginlantaw ko ang mga litrato sang tagsa ka Pangulo sang Simbahan.

Samtang ginatulok ko sila nga nauna sa akon—humalin sa Propetang si Joseph Smith (1805–44) pakadto kay Pangulong Gordon B. Hinckley (1910–2008)—nagpanumdum ako, “Daw ano kadako sang akon pagpasalamat sa paggiya sang kada isa.”

Mga tawo ini sila nga wala gid nagduha-duha, wala gid nagpangalag-ag, kag wala gid nagpaslaw. Mga tawo ini sila sang Dios. Sang ginapanumdum ko ang mga propeta sa moderno nga panahon nga akon nakilala kag ginpalangga, nadumdu man ko ang ila mga kabuhi, ang ila mga kinaiya, kag ang ila inspirado nga mga panudlo.

Si Pangulong Heber J. Grant (1856–1945) amo ang Pangulo sang Simbahan sang natawo ako. Sa pagbinag-binag ko sang iya kabuhi kag mga panudlo, nagapati ako nga isa ka kinaiya nga pirme ginapakita ni Pangulong Grant amo ang kapisan—kapisan sa sinang mga butang nga maayo kag talahuron.

Si Pangulong George Albert Smith (1870–1951) amo ang Pangulo sang Simbahan sang panahon nga nag-alagad ako bilang bishop sang akon ward sa Salt Lake City. Nag-hambal sia nga may daku nga pag-agaway nga nagaluntad sa tunga sang Ginuo kag sang kaaway. “Kon magpabilin ka sa hubon sang Ginuo,” panudlo niya, “mangin yara ka sa idalom sang iya impluwensya kag wala sing mangin

huyog nga maghimo sang indi husto.”<sup>1</sup>

Gintawag ako nga mag-alagad bilang miyembro sang Korum sang Napulo'g Duha ka mga Apostoles sang 1963 ni Pangulong David O. McKay (1873–1970). Nagpanudlo sia sang pagpasunaid sa iban paagi sa iya kaugalingon nga pagpangabuhi. “Ang matuod-tuod nga pagka-Kristiyano,” siling niya, “paghigugma sa buhat.”<sup>2</sup>

Si Pangulong Joseph Fielding Smith (1876–1972), nga isa sang may pinakamadamo nga mga sinulatan sa mga manululat sang Simbahan, naghimo sang pagtuon sang ebanghelyo bilang iya giya nga prinsipyos sa kabuhi. Wala untat ang iya pagbasa sang balaan nga mga kasulatan kag wala na ako sang iban pa nga nakilal-an nga nakasayod sang mga panudlo kag mga doktrina nga makita sa mga pamihak sini pareho sa iya.

Si Pangulong Harold B. Lee (1899–1973) nag-alagad bilang akon stake president sang bata pa ako. Isa sang iya paborito nga dinalan amo ang “Magtindog kamo sa balaan nga mga lugar, kag indi kamo malingkang.”<sup>3</sup> Ginpaisog niya ang mga Santos nga mangin nagakaangay, kag handa sa pagbaton, sang mga paghutik sang Balaan nga Espiritu.

Nagapati ako nga isa ka giya nga prinsipyos sa kabuhi ni Pangulong Spencer W. Kimball (1895–1985) amo ang dedikasyon. Lubos sia kag indi manegar nga dedikado sa Ginuo. Dedikado man sia sa pagpangabuhi sang ebanghelyo.

Sang si Pangulong Ezra Taft Benson (1899–1994) nangin Pangulo sang Simbahan, gintawag niya ako nga mag-alagad bilang iya Ikaduhang Manuglaygay sa Unang Panguluhan. Ang iya giya nga prinsipyos amo ang pagpalangga, nga yara sa iya paborito nga dinalan, nga gin-hambal sang Manluluwas: “Ano nga sari sang tawo kamo

mangin dapat? Sa pagkamatuod ginasiling ko sa inyo, bisan subong man sa akon.”<sup>4</sup>

Si Pangulong Howard W. Hunter (1907–95) isa nga pirme makita ang kaayo sa iban. Pirme sia matinahuron; pirme sia mapainubuson. Pribelihiyo ko nga mag-alagad bilang iya Ikaduhang Manuglaygay.

Si Pangulong Gordon B. Hinckley nagtudlo sa aton sa paghimo sang tanan naton nga masarangan. Naghatag sia sang mabaskog nga panaksihon parte sa Manluluwas kag sa Iya misyon. Gintudloan niya kita sing may pagpalangga. Ang mag-alagad bilang iya Unang Manuglaygay isa ka dungog kag bugay para sa akon.

Ang Manluluwas nagapadala sang mga propeta bangod palangga Niya kita. Sa pangkabiligan nga komperensya sining Oktubre, ang mga General Authority sang Simbahang sa liwat makaangkon sang pribelihiyo sa pagpaambit sang Iya pulong. Ginahikot namon ining responsibilidad nga may daku nga pagtahod kag pagpaubos.

Daw ano kita ka bulahan nga ang ginpanumbalik nga Simbahang ni Jesucristo yari sa duta kag ang Simbahang napasad sa bato sang rebelasyon. Ang nagapadayon nga rebelasyon amo ang pinakaimportante nga bahin sang ebanghelyo ni Jesucristo.

Kabay nga maghanda kita sa pagbaton sang personal nga rebelasyon nga nagaabot sing bugana sa tion sang pangkabiligan nga komperensya. Kabay nga ang aton mga tagipusuon mapuno sang hugot nga pagtinguha samtang ginaalsa naton ang aton mga kamot agud itib-on ang buhi nga mga propeta kag mga apostoles. Kabay nga masanagan kita, mainspirar, mapasulhay kag mapabakod sa aton pagpamati sa ila mga mensahe. Kag kabay nga mangin handa kita sa pagdedikar liwat sang aton mga kaugalingon sa Ginoong Jesucristo—sa Iya ebanghelyo kag Iya buluhaton—kag sa pagpangabuhi nga may dugang nga kabakod sa pagtuman sang Iya mga kasugoan kag paghimo sang Iya pagbuot.

#### MGA TANDA

1. *Teachings of Presidents of the Church: George Albert Smith* (2011), 191.
2. *Teachings of Presidents of the Church: David O. McKay* (2003), 181.
3. Tan-awa sa Doctrine and Covenants 87:8
4. 3 Nefi 27:27.

#### PAGTUDLO GIKAN SA SINING MENSAHE

Si Pangulong Monson nagapaambit sang gamhanan nga mga leksyon nga iya natun-an halin sa mga propeta antes sa iya. Ginapahanumdum niya man kita

nga “ang Manluluwas nagapadala sang mga propeta bangod palangga Niya kita.” Sa pag-alagad sa inyo mga ginatudloan, mahimo ninyo hambalan kon paano ang mga propeta kag mga apostoles mga patimaan sang gugma sang Dios para sa aton. Hunahunaa ang pagpaambit sang laygay halin sa isa sang nagligad nga mga pamulong-pulong ni Pangulong Monson sa pangkabiligan nga komperensya. Agdaha ang inyo ginatudloan nga maghanda para sa pangkabiligan nga komperensya paagi sa pagtuon liwat sang mga pulong nga labi nga naghatag sa ila sang inspirasyon kag nagbulig sa ila nga mabatyagan ang pagpalangga sang Manluluwas.

## LAMHARON

### Salamat, O Dios, sa Manalagna

Paano ang aton propeta, nga si Pangulong Thomas S. Monson, nag-impluwensya sa inyo? Ano ang madumduman nyo gid parte sa iya? Hunahunaa ang pagsulat sa inyo journal parte kay Pangulong Monson kag sa iya kabuhi—pareho nga ginalaragway niya sa sining mensahe ang impluwensya sang tagsa ka propeta nga iya madumduman.

Basi luyag man ninyo magpili sang isa ka paborito nga dinalan halin sa iya kag isulat ini kon sa diin makita ninyo ini pirme, pareho abi sa isa ka folder sa eskwela-han ukon bilang isa ka mensahe sa inyo kwarto. Pwede man kamo maghimo sang isa ka larawan-nga-may dinalan halin sini kag himuong ini nga background sang inyo telepono. Sa tagsa ka tion nga makita ninyo ang dinalan, mahimo ninyo panumduon ang kaimportante sang isa ka buhi nga propeta kag tandaan nga ari sia diri agud magpalangga kag maggiya sa aton sa karon.

Mahimo ninyo idownload ang musika sang “We Thank Thee, O God, for a Prophet” sa [lds.org/go/9176](https://lds.org/go/9176).

## MGA KABATAAN

### Ang mga Propeta Nagadala sa aton kay Cristo

Ang Manluluwas nagahatag sa aton sang mga propeta bangod palangga Niya kita. Ang pagsunod sa mga propeta nagbulig sa aton sa pagpili sang husto. Ano ang duha ka mga butang nga mahimo ninyo agud sundon ang propeta?



# Isa sang Tagipusuon

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano bala ang paghangop sang katuyuan sang Relief Society nagahanda sa mga anak nga babayi sang Dios para sa mga bugay sang kabuhi nga wala'y katapusan?

**K**ag ang Ginuo nagtawag sang iya katawhan nga Sion, kay isa sila sa tagipusuon kag isa sa hunahuna, kag nagpuyo sa pagkamatarrong; kag wala sing imol sa tunga nila” (tan-awa sa Moses 7:18). Paano kita mangin isa?

Si Elder M. Russell Ballard sang Korum sang Napulo'g Duha ka mga Apostoles nagsiling: Sa tunga sang Ingles nga tinaga nga *atonement* (*pagsag-uli*) amo ang tinaga nga *one* (*isa*). Kon ang bug-os nga katawhan nakaintiendi sini, wala sing bisan isa nga indi naton pagkabalakhan, wala sapayan sang edad, rasa, kasarian, relihiyon, ukon sosyal o pinansyal nga kahimtangan. Magapaninguha kita nga sundon ang Manluluwas kag indi gid mangin mapintas, wala'y labot, di-matinahuron, ukon insensiti-bo sa iban.”<sup>1</sup>

Si Pangulong Henry B. Eyring, Unang Manuglaygay sa Unang Panguluhan nagpanudlo: “Kon sa diin kaupod sang mga tawo [ang] Espiritu, makapaabot [sila] sang maayo nga pagsinalayo. . . . Ang Espiritu sang Dios wala nagatuga sang pagbinaisay (tan-awa sa 3 Nefi

11:29). . . . Nagadala ini sang katawhay sa kaugalingon kag balatyagon sang pag-isa sa iban.”<sup>2</sup>

Nga nagahambil parte sa mga hangkat sang pamilya, si Carole M. Stephens, nga nag-alagad bilang Unang Manuglaygay sa Pangkabilugan nga Panguluhan sang Relief Society nagsiling: “Wala ako nakaagi sang diborsyo, sang kasakit kag kawala' y kompiyansa nga kaupod sang pagbiya, ukon sang responsibilidad mahiangot sa pagka-solo nga ginikanan. Wala ako nakaagi nga napatyan sang isa ka anak, pagkabaw-as, ukon kaluyag sa pareho ko nga babaye. Wala ako nakaagi sang pag-abuso, malawig nga pagmasakit, ukon adiksyon. Indi nangin amo sini ang mga higayon nga mainat ako.

“. . . Apang paagi sa kaugalingon-ko nga mga pagsulay kag pagtilaw . . . nakilala ko gid ang Isa nga nakaintiende. . . . Kag dugang pa, naagyan ko ang tanan nga mga pagtilaw sang kabuhi nga bag-o ko lang namitlang paagi sa salaming sang isa ka anak, iloy, lola, utod, tiya, kag abyen.

**Pagtuo, Pamilya, Bulig**

“Ang aton mga oportunidad bilang mga nagatuman-kasugtanan nga mga anak nga babayi sang Dios indi lang ang magtuon halin sa aton mga hangkat; kundi ang makig-isa sa pag-intiendi kag pagkaluoy samtang ginasakdag naton ang iban pa nga mga miyembro sang pamilya sang Dios sa ila mga pagpangabudlay.”<sup>3</sup>

**Dugang nga Balaan nga mga Kasulatan kag Impormasyon**  
Juan 17:20–23; Mga Taga-Efeso 4:15; Mosias 18:21–22; 4 Nefi 1:15; [reliefsociety.lds.org](http://reliefsociety.lds.org)

## MGA TANDA

1. M. Russell Ballard, “The Atonement and the Value of One Soul,” *Liahona*, Mayo 2004, 86.
2. Henry B. Eyring, “That We May Be One,” *Ensign*, Mayo 1998, 67.
3. Carole M. Stephens, “The Family Is of God,” *Liahona*, Mayo 2015, 11–12.

## Binagbinaga Ini

Paano ang pag-isa sa tagsa-tagsa makabulig sa aton nga mag-isa sa Dios?